



*Minggu 06 Juni 2021*

**Ogen: Ulangen 6: 7**



**"Makeken Waktu ras Anak"**



**L**a bagi biasana libur i bas tahun enda, adi biasana libur e banci jadi sada kesempatan keluarga dalan-dalan ku sada ingan, pulau ntah kota sideban, bahkan ope tahun enda man keluarga si malala duitna lit ka nge gawah-gawah ku luar negri. Tapi i bas tahun enda beda, lanai bo enterem kalak gawah gawah ku ingan sideban erkiteken pandemi covid 19 enda, anem bage gia perlu ka nge lit kebersamanta ras anak-anakta alu njaga prokes banci ka nge siaturken waktunta la gia ndauh tapi lit kebersamanta sabap alu la si sedari anak-anakta enda pe lit ka nge stressna ngalaken pelajaran alu daring, banci saja turah kebosanenna, deba nggo ka sereh pe ia perban lanai ku sekolah, emaka banci saja enterem denga siswana tercatat i sekolah tapi kinatana la bage.

Libur enda perlu siaturken waktu ras anak –anakta la pe ku ingan si mehaga tapi lit kebersamanta keluarga. Baba nakan i rumah nari man ras kita i je ridi-ridi entah engkawil, guro-guro janah rende rende. Adi lit ibaba gitar mbangun talenta ras percaya diri man anak anakta janah menikmati kebersamaan keluarga. I bas mbangun kebersaman ras keluarga e banci ka kita i je nehken Pengajaran, kekompakan ras sepegejapen erturang ersenina. Kebersaman e ibangun i bas jabunta nari gelah paguh jabu ngelakoken si mehuli. Banci saja i je ia bernostalgia ras nginget kenangen si mehuli gelah tetap ia ertedeh ate kerna keluarga. Kata Dibata i bas kitab Ulangen 6:7 ngajak kita gelah ngajarken man anak, persingetilah rusur subuk sanga kam i rumah, ntah sanga kam i bas perdalinen subuk ntah kam sanga ngadi ngadi entah pe erdahin kerna Kata Dibata. Kata e nuduhkan maka litna kebersaman bas keluarga situhuna mbangun benteng ntah pe kekuatenta nehken si mehuli. Ula la si akap meherga kebersaman. Lit sada kasus si pernah jadi, i ja sekalak anak si la pernah iajak gawah-gawah erkiteken kesibuken orangtuana, bapana seh kal sibukna, ngawanken pe anakna la terarakkensa ku Gereja. Dungna anak enda ndai mengurung diri, la nggit ndarat i bas kamar nari 3 bulan dekahna piahna depresi anak e. Pertenget man banta orangtua maka perlu kal mbangun kebersamaan keluarga.

